

Na osnovu člana 32. stav 6. Zakona o profesionalnoj rehabilitaciji, osposobljavanju i zapošljavanju osoba sa invaliditetom ("Službene novine Federacije BiH", broj 9/10), federalni ministar rada i socijalne politike donosi

## **PRAVILNIK**

### **O BLIŽIM USLOVIMA U POGLEDU PROSTORA, OPREME I STRUČNE SPREME ZAPOSLENIKA U RADNIM CENTRIMA**

#### **Član 1.**

Ovim pravilnikom propisuju se bliži uslovi u pogledu prostora, opreme i stručne spreme zaposlenika koji moraju biti ispunjeni za rad radnog centra i za obavljanje djelatnosti na osiguranju rada osobama sa invaliditetom koje se ne mogu zaposliti ili održati zaposlenost pod opštim uslovima, u preduzećima za zapošljavanje osoba sa invaliditetom ili u zaštitnim radionicama.

#### **Član 2.**

Radni centar mora imati određen broj funkcionalno raspoređenih prostorija za rad i obavljanje djelatnosti za koje je centar osnovan, a koje su izgrađene i uređene u skladu sa standardima.

#### **Član 3.**

Radni centar kod koga osobe sa invaliditetom na radu imaju položaj korisnika usluga i kojima se obezbjeđuje i cjelodnevni boravak mora imati slijedeće prostorije:

1. spavaonice,
2. kuhinjski blok sa priručnim skladištem i drugim pratećim prostorijama za pripremanje i kuhanje hrane,
3. trpezariju,
4. prostor za radne i terapijske aktivnosti, te aktivnosti slobodnog vremena,
5. sanitarno-higijenski blok,
6. praonicu rublja sa peglaonicom i sušarom,
7. radne prostorije za stručne i druge radnike.

#### **Član 4.**

Prostorije iz člana 3. ovog pravilnika moraju ispunjavati slijedeće uslove, a to da su:

1. svijetle i suhe,
2. vrata u prostorijama u pravilu, bez pragova, veličine propisane prema namjeni prostora, a zastakljena vrata da imaju zaštitu,
3. podovi izvedeni od materijala koji nisu klizavi i upijajući, a u spavaonici od toplog materijala, koji se lako održava, a nije upijajući,

4. prostorije gdje borave korisnici direktno prirodno osvijetljene i da imaju prirodno provjetranje, a pomoćne prostorije mogu imati vještačko osvjjetljenje i provjetranje.

#### **Član 5.**

Broj spavaonica zavisi od broja osoba sa invaliditetom, korisnika koji cjelodnevno borave u radnom centru.

Kuhinjski blok sa priručnim skladištem i drugim pratećim prostorijama za pripremanje i kuhanje hrane mora da odgovara uslovima predviđenim u Zakonu o ugostiteljskoj djelatnosti ("Službene novine Federacije BiH", broj 32/09).

Trpezarija mora funkcionalno da bude povezana sa glavnom ili pomoćnom kuhinjom.

Građevinski objekat radnog centra, zavisno od broja osoba sa invaliditetom na radu i broja osoba sa invaliditetom kojima se obezbjeđuje cjelodnevni smještaj, mora imati prostorije za radne terapijske aktivnosti, te prostorije za aktivnosti slobodnog vremena.

U građevinskom objektu moraju postojati kupatila i mokri čvorova odvojeni za muške i ženske korisnike.

Praonica rublja se sastoji od prostorija za prijem, pranje, sušenje, peglanje, skladištenje i izdavanje veša.

U građevinskom objektu mora biti odgovarajući broj prostorija za stručne i druge radnike.

#### **Član 6.**

Za zagrijavanje prostorija mogu se koristiti svi postojeći oblici zagrijavanja, ali se mora voditi računa da sistem zagrijavanja bude tako postavljen i osiguran da se do maksimuma postigne bezbjednost korisnika usluga radnog centra.

#### **Član 7.**

Oprema radnog centra mora biti takve izrade da odgovara namjeni pojedine prostorije i kategoriji osoba sa invaliditetom na radu, odnosno korisnika usluga, te tehničkim, higijenskim i estetskim zahtjevima i da se može lako održavati ispravnom i urednom.

Spavaonice moraju biti opremljene ležajevima, stolom i potrebnim brojem stolica, ormarom za odjeću, posebno za svakog korisnika i zavjesom.

Oprema u prostorijama za radne i terapijske aktivnosti, te aktivnosti slobodnog vremena mora biti prilagođena broju, potrebama i mogućnostima korisnika usluga.

Ostale prostorije, zavisno od namjene i broja korisnika, moraju imati odgovarajuću opremu.

#### **Član 8.**

Broj, stručnu spremu i kvalifikacije stručnih radnika potrebnih za obavljanje djelatnosti, radni centar utvrđuje svojim aktima, imajući u vidu broj i kategoriju osoba sa invaliditetom na radu i broj osoba sa invaliditetom korisnika usluga.

**Član 9.**

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj 02-02/8-810/11  
18. aprila 2011. godine  
Sarajevo

Ministar  
**Vjekoslav Čamber, s. r.**